

四庫全書

子部

欽定四庫全書

子部

佛祖歷代通載卷三  
四

詳校官給事中臣鄧文泮

檢討臣何思鈞覆勘

總校官檢討臣何思鈞

校對官學正臣李巖

謄錄監生臣李如梓

欽定四庫全書

佛祖歷代通載卷三

元 釋念常 撰

周

己丑昭王瑕

康王子王道微缺因南  
巡狩乘膠船沈於水

治五十一年

癸丑二十五年四月八日大聖現白象瑞七支案地乘  
雲而下降神大術胎中右脇而坐豈若虹樞現表厥命  
世者也

甲寅二月八日世尊生子迦毘羅衛國藍毘尼園波羅

又樹下從母摩耶夫人右脇而出姓刹利父淨飯天母  
大清淨生時九龍吐水金盤沫已周行七步自言吾受  
最後生身天上天下惟吾獨尊相好莊嚴具三十二大

人之相諸經有別

且依一文三十二者一足下平滿二千輻輪紋三手柔軟如兜羅綿四指

間網鞞猶如鷲王五諸指纖長六足跟充滿七足跌相承八雙臂修直九雙臑圓滿如伊尼延鹿王十陰峰藏容如象馬王十一毛青右旋十二髮毛上靡十三身皮金色十四皮閏離垢十五七處充滿十六肩項殊妙十七膊腋脯直十八容儀紅滿十九身相端嚴二十量圓孤柳二十一額臆獅子二十二常光一尋二十三齒白齊密二十四牙鮮鋒利二十五常得上味二十六舌覆面輪二十七梵音頻伽二十八眼睫紺青二十九眼睛

如牛王三十面如滿月三十一眉間白毫三十二鳥  
鬚膩叱猶如天蓋更有八十隨好具如般若等說

丙辰太子三歲父王携謁天神廟神像起立王驚歎曰  
天中天

庚申太子七歲詣師習世間書典

癸亥太子十歲與兄弟搆力以手擲象城外射透鑊鼓  
九重甲子世尊示出家太子出遊四門見生老病死者  
北門見出家人生欣樂心戊寅二月八日夜淨居天報  
言太子出家時至 缺 乘為 缺 城至檀特山拔劍斬髮入

彌樓山阿藍迦處

缺

不用處定今依六年苦行三十成

道之教也有謂十二月

缺

日出家諸部說異玄贊疏云

總會諸文而為二說一云諸部說十九出家三十成道

本起因緣經亦十九歲思惟無相三昧經三十成道智

論亦十九不說成道時佛住世實八十年有會十九出

家五年事仙人行樂行六年行苦行三十成道智論用

此二云亦有諸部及大乘說二十九出家三十五成道

增一中雜三阿舍經出曜經和須密論竝說二十九悲

華缺經善見論說三十五成道本起經云三十五也菩  
提流支引經偈云八年作嬰兒七年作童子四年學五  
明十年受五欲六年行苦行三十五成道四十五年中  
教化諸衆生真諦及西域記竝同此說金光明經報恩  
經等同說佛壽八十年也甲子但七十九年略釋偈曰

缺

伽釋云

一缺

一種相一顯示正

因果相二已作不缺

相

二者因明有二種

相一示摧折他論勝利相二示免脫他論勝利相三  
者聲明亦有二相一示安立字界及能成立相二示語  
工巧勝利相四醫方明有四種相一示病體善巧相  
二示病目善巧相三示斷已更生善巧相四示斷已不

生善巧相 五者工巧明善諸世法 三端六義等言  
 三端者一文筆二武鋒三辨舌也六義者一禮長幼謙  
 謹二樂風俗正變三書八體六書四數窮知梯璩五射  
 能開弓弩六御善調象馬世尊在宮為太子時性自仁  
 賢曰禮通諸風俗曰樂六十四書悉曉曰書百二十數  
 竝窮曰數透九重鐵鼓曰射擲塞門大象曰御餘如經

論廣  
 陳

庚辰穆王滿

昭王子

用造父為御乘乎八駿日行千里

具

周

史治五十五年

五十歲即位 壽一百四年

作甫刑

王命甫侯呂緹 入為司寇增輕

減重約五刑為三千墨劓各一千荆 五百宮三百大辟二百孝經甫刑是

傀儡

乃偃師之作始獻于

王化人

北山曰王時西極有化人來反山州移城邑 入水火貫金石千變萬化不可窮矣王敬之

若聖築中天臺以居之乃曼殊室利  
目連等示相也然王未知是佛弟子

癸未世尊示成道苦行六年既滿沐於熙泥連河受牧  
牛女之乳糜納吉祥之軟草詣菩提樹王坐金剛座上  
三十四心示成正覺號天人師具一切智住世垂訓四  
十九年說法三時初中後善以有空言破空有執二邊  
既離中道斯存俾利鈍機發修自行故演而伸之為八  
萬四千之法藏也博施濟衆因果張焉斷惡懲善聖凡  
別矣羣生自茲有仗也初入鹿苑度五比丘

甲申度優樓頻羅迦葉千人出家

乙酉佛象頭山為龍鬼說法等

丙戌佛度舍利弗目犍連二百五十人出家

丁亥須達長者布金買祇陀園建寺奉佛

戊子佛在拘耶尼國為婆陀和菩薩說苦行般若等經

己丑佛在柳山為純真陀羅王等說法

庚寅佛在穢澤為阿掘摩說法及升忉利天

梅檀像始建世尊成道八年上忉利天為母說法經九

十日優闡國王思慕如來命大目連及毘首羯摩天化為匠人詣天宮摹佛相好以栴檀香木刻像供養既而夏滿下降中天王及大臣及國人民同往迎佛其像騰空向佛問訊佛為摩頂受記曰我滅度千年以後汝往震旦廣利人天

辛卯佛還摩竭國為弗沙王說法等

壬辰佛為彌勒說修行本起經

癸巳佛還迦毘羅國為父王說法普曜經載此

戊戌佛於欲色二界說大集等經

己亥佛始說十六會八部般若等經

辛丑佛始檢約徒衆勅置戒律

丙午佛從弟阿難始出家

辛亥阿難請佛度摩訶波闍波底比丘尼等出家

甲子辛未佛說金光明并法華等經于靈山會上是年

世尊拈花示衆百萬人天皆茫然惟金色頭陀破顏微

笑世尊曰吾有正法眼藏涅槃妙心實相無相微妙法

門今付於汝汝當護持并勅阿難副貳傳化聽吾偈曰  
法本法無法無法法亦法今付無法時法法何曾法爾  
時世尊說此偈已復告迦葉吾將金縷僧伽黎傳付於  
汝轉授補處慈氏母令斷絕

拈花之事荆國王公對佛  
惠禪師泉萬卷言親見於

梵王問佛經中具載但此經多言國  
家帝王之事藏之秘府世故無聞

壬申二月十五日世尊示涅槃應世七十九年化緣周  
畢於拘尸羅國金沙跋提河間娑羅雙樹下說涅槃經  
及遺教經已安住常寂滅光名大涅槃右脇而臥於中

夜寂然無聲闍維得舍利八斛四斗

涅槃經前  
後分具明

時有白

虹一十二道南北貫通連宵不滅穆王問太史扈多曰

是何徵也對曰西方有大聖人滅度衰相現也王曰朕

常患此今既滅度更何憂耶西土諸王以香木闍維分

身建塔震旦計十九處

乙亥共王繫扈

穆王  
子

有聖德治十二年

王嘗游于涇上  
密康公從有三

女奔康公受之而  
不以獻王遂滅密

丁亥懿王躋

共王  
子

周室衰

詩人刺之遷都  
槐里又遷廢丘

治二十五年

齊五世哀公荒淫王  
命烹之作變風刺之

壬子孝王辟方

共王弟  
懿王叔

王時外國有進二尺虎又進四

角犀治十五年

丙辰第一祖摩訶迦葉摩竭陀國人也姓婆羅門父飲  
澤母香志昔為鍛金師善明金性使其柔伏付法傳云  
嘗於久遠劫中毗婆尸佛入涅槃後四眾起塔塔中像  
面上金色有少缺壞時有貧女將金珠往金師所請飾  
佛面既而因共發願願我二人為無姻夫妻由是因緣

九十一劫身皆金色後生梵天天壽盡生中天摩竭陀國婆羅門家名曰迦葉波此云飲光勝尊蓋以金色為號也緣是志求出家冀度諸有佛言善來比丘須髮自除袈裟著體常於衆中稱歎第一復言吾以清淨法眼將付於汝汝可流布無令斷絕涅槃經云爾時世尊欲

涅槃時迦葉不在衆會

嵩禪師正宗記評曰昔涅槃會之初如來告諸比丘曰汝等不

應作如是語我今所有無上正法悉已付囑摩訶迦葉是迦葉者當為汝等作大依止然正宗者聖人容相傳授不可必知其處與時也以經酌之則法華先而涅槃後也方說法華迦葉預焉及涅槃而不在其會吾謂付

法之時其在二經之間耳或謂靈山拈花又曰付法於多子塔前然此未見所出吾雖稍取亦不敢果以為審

也佛告諸大弟子迦葉來時可令宣揚正法眼藏爾時迦

葉在耆闍崛山賓鉢羅窟覩勝光明即入三昧以淨天眼觀見世尊於熙連河側入般涅槃乃告其徒曰如來涅槃也何其駛哉即至雙樹間悲戀號泣佛於金棺內現雙足爾時迦葉告諸比丘佛已荼毗金剛舍利非我等事我等宜當結集法眼無令斷絕乃說偈曰如來弟子且莫涅槃得神通者當赴結集於是得神通者悉集

王舍者闍崛山賓鉢羅窟時阿難為漏未盡不得入會  
後證阿羅漢果由是得入迦葉乃白衆言此阿難比丘  
多聞總持有大智惠常隨如來梵行清淨所聞佛法如  
水傳器無有遺餘佛所讚歎聰敏第一宜可請彼集修  
多羅藏大衆默然迦葉告阿難曰汝今宜宣法眼阿難  
聞語信受觀察衆心而宣偈言比丘諸眷屬離佛不莊  
嚴猶如虛空中衆星之無月說是偈已禮衆僧足升法  
座而說是言如是我聞一時佛住某處說某經教乃至

人天等作禮奉行時迦葉問諸比丘阿難所言不錯謬乎皆曰不異世尊所說迦葉乃告阿難言我今年不久留今將正法付囑於汝汝善守護聽吾偈言法法本來法無法無非法何以一法中有法有不法說是偈已乃持僧伽黎衣入雞足山俟慈氏下生即周孝王五年丙辰歲也

甲子丁卯秦非子

其先高陽之後始女修大業大費佐舜為相大廉孟戲中行乃大廉玄孫鳥身

人言為殷大戊之御中滴飛廉惡來秦之先也先是柏翳佐禹治水有功舜賜姓嬴氏後至非子周

孝王使主馬又大蕃息封于秦號曰秦嬴至德  
公居雍城秦州龍城縣也後穆公始霸至昭襄  
稱王自非子下秦侯公伯秦仲莊襄文寧出武  
德宣成穆康共桓景惠悼厲躁懷靈簡惠出獻  
孝惠文王武王昭王三十  
二君六百三十八年也

夷王燮

懿王次子周室陵遲諸侯  
朝朔下堂迎之治十六年

癸未厲王胡

夷王子暴虐無道國人叛之  
襲殺于流通周召五十一年

癸巳二祖阿難王舍城人也姓刹利帝父斛飯王實佛  
之從弟也梵語阿難陀此云慶喜亦云歡喜如來成道  
夜生因為之名多聞博達智惠無礙世尊以為總持第

一嘗所讚歎加以夙世有大功德受持法藏如水傳器  
佛乃命為侍者後阿闍世王白言仁者如來迦葉尊勝  
二師皆已涅槃而我多故悉不能覩仁者般涅槃時願  
垂告別阿難許之後自念言我身危脆猶如聚沫況復  
衰老豈能長久又念阿闍世王與吾有約乃詣王宮告  
之曰吾欲入涅槃故來辭耳門者曰王寢不可以聞阿  
難曰俟王覺時當為我說時王夢中見一寶蓋七寶嚴  
飾千萬億眾圍繞瞻仰俄而風雨暴至吹折其柄珍寶

瓔珞悉墜於地心甚驚異既寤門者具白上事王聞語已失聲號慟哀感天地即至毘舍離城見阿難在恒河中流跏趺而坐王乃作禮而說偈言稽首三界尊棄我而至此暫憑悲願力且莫般涅槃時毘舍離王亦在河側復說偈言尊者一何速而歸寂滅場願住須臾間而受於供養爾時阿難見二國王咸來勸請乃說偈言二王善嚴住勿為苦悲戀涅槃當我淨而無諸有故阿難復念我若偏向一國而般涅槃諸國爭競無有是處應

以平等度諸有情遂以恒河中流將入寂滅是時山河大地六種震動雪山中五百仙人覩茲瑞應飛空而至禮阿難足胡跪白言我於長老當證佛法願垂大慈度脫我等阿難默然受請即變琬伽河悉為金地為其仙衆說諸大法阿難復念先所度脫弟子應當來集須臾五百羅漢從空而下為諸仙人出家受具其仙衆中有二羅漢一名商那和修二名末田底迦阿難知是法器乃告之曰昔如來以大法眼付大迦葉迦葉入定而

付於我我今將滅用傳於汝汝受吾教當聽偈言本  
來付有法付了言無法各各須自悟悟了無無法阿難  
付法眼藏竟踊身虛空作十八變入風奮迅三昧分身  
四分一分奉忉利天一分奉娑竭羅龍宮一分奉毘舍  
離王一分奉阿闍世王各建寶塔而供養之乃厲王十  
年癸巳歲也

辛亥世尊入滅一百年矣

傳曰百歲已前人傳雖異法味一如五師傳教首迦

荼波傳之阿難阿難傳商那和修商傳優波翹多優  
傳末田底迦自此百年之後法踈一味水乳兩和析  
氎分金各宗異見源流派別二部斯興一上座部二  
大衆部三百年來展轉分破大衆本末別成九部大  
衆部一說部說出世部雞屠部多聞部說假部制多  
山部西山住部北山住部 上座本末成十一部說  
一切有部上座部犢子部法上部賢胃部正量部密  
林山部化地部法藏部飲光部經量部嗚呼正法

加絲以麻嘉謨增乳以水慕道者惑于異端孰非曷  
是悲哉

庚申共和元年王崩

王時求巫監謗百姓不言政道路相逢視之以自由是作亂叛王于

羸在政三十七年周召二伯行政號共和凡十四年

甲子甲戌宣王靖

厲王子初王奔羸太子匿名公家國人圍之公以子代之太子方得脫既長周

名二伯立之為王修文武成康之風諸侯復宗周時天下大旱王自責身六事乃雨

治四十六年

王臣史籀改蒼頡古文為大篆

今跋下石陂有數字至宋蘇軾辨得幾字

乙未鄭桓公友

厲王少子宣王之弟初封鄭今華陰縣後徙蒙陽今新鄭是至幽公

弟君乙為君自桓下武莊厲昭壘嬰文繆靈襄  
悼成釐簡定獻聲哀共幽濡乙凡二十三君二

百八十

一年

第三祖商那和修摩突羅國人也亦名舍那婆斯姓毘  
舍多父林勝母憍奢邪在胎六年而生梵云商諾迦此  
云自然服即西域九枝秀草名也若羅漢聖人降生則  
此草生於淨地祖生時瑞草斯應昔如來行化至摩突  
羅國見一青林枝葉茂盛語阿難曰此林地名優留茶  
吾滅度後一百年有比丘商那和修於此地轉妙法輪

後百歲果誕祖出家證道受慶喜尊者法眼化導有情  
及止此林降二火龍歸順佛教龍因施地以建梵宮祖化  
緣既久思付正法尋於吒利國得優波耄多以為給侍  
因問耄多曰汝年幾邪答曰我年十七祖曰汝身十七  
性十七邪答曰師髮已白為髮白邪心白邪祖曰我但  
髮白非心白耳曰我身十七非性十七也和修知是法  
器三載後遂為落髮受具乃告曰昔如來以無上正法眼  
藏付囑迦葉展轉相授而至於我我今付汝勿令斷絕

汝受吾教聽吾偈言非法亦非心無心亦無法說是心  
法時是法非心法說偈已即隱於罽賓國南象白山中  
後於三昧中見弟子邈多有五百徒衆常多懈慢祖乃  
往彼現龍奮迅三昧以調伏之而說偈曰通達非彼此  
至聖無長短汝除輕慢意疾得阿羅漢五百比丘聞偈  
已依教奉行皆獲無漏祖乃作十八變火光三昧用焚  
其身邈多收舍利葬於梵迦羅山五百比丘各持一幡  
迎導至彼建塔供養乃宣王二十二年乙未歲

己未王無辜殺杜伯一日出畋見杜伯持弓矢射王中  
心墮車折脊而死事見墨子載也

庚申幽王宮涅

宣王子嬖褒姒生伯服廢太子與申后而立伯服褒姒不好笑王乃舉烽燧大

鼓諸侯皆至又且無寇褒姒大笑王悅後申侯與犬戎同伐王于驪山復舉烽燧諸侯不至遂死山下乃扶太子宜臼為王以奉周祀

在位十一年

甲子庚午馮王伯服

幽王庶子西兵殺王伯服乃立國人不順未經年而廢之

東周

一十四主  
都于洛陽

辛未平王宜臼

幽王太子  
申侯立之

東遷洛京以辟難治五十一

年

壬申諸侯寢盛政出方伯

辛卯世尊示滅二百年矣

庚子第四祖優波耆多吒利國人也亦名優波崛多又名鄔波耆多姓首陀父善意十七出家二十證果隨方行化至摩突羅國得度者甚衆由是魔宮震動波旬愁怖遂竭其魔力以害正法祖即入三昧觀其所由波旬復伺便密持瓔絡縻之于頸及祖出定乃取人狗蛇三

屍化為華鬢。爰言慰諭。波旬曰：汝與吾瓔絡甚。是珍妙。吾有華鬢，以相酬奉。波旬大喜，引頸受之，即變為三種臭屍蟲蛆，壞爛波旬厭惡。大生憂惱，盡已神力不能移。動乃升六欲天，告諸天王。又詣梵王，求其解免。彼各告言：十力弟子所作神變，我輩凡陋，何能去之。波旬曰：然則奈何。梵王曰：汝可歸心尊者，即能除斷。乃為說偈。令其回向曰：若因地倒，還因地起。離地求起，終無其理。波旬受教已，即下天宮。禮尊者足，哀露懺悔。龜多告曰：汝

自今去於如來正法更不作燒害否波旬曰我誓回向  
佛道永斷不善祖曰若然者汝可口自唱言歸依三寶  
魔王合掌三唱華鬘悉除乃歡喜踊躍作禮尊者而說  
偈曰稽首三昧尊十力聖弟子我今願回向勿令有劣  
弱尊者在世化導證果最多每度一人以一籌置于石  
室其室縱十八肘廣十二肘充滿其間最後有一長者  
子名曰香衆來禮尊者志求出家祖問曰汝身出家心  
出家答曰我求出家不為身心祖曰不為身心復誰出

家曰夫出家者無我我故無我我故即心不生滅心不生滅即是常道諸佛亦常心無形相其體亦然祖曰汝當大悟心自通達宜依佛法僧紹隆聖種即為剃度受具足戒仍告之曰汝父嘗夢金日而生汝可名提多迦復謂曰如來以大法眼藏次第傳授以至於我今復付汝聽吾偈言心自本來心本心非有法有法有本心非心非本法付法已乃踊身虛空呈十八變然後本坐跏趺而逝多迦以室內籌用焚其軀收舍利建塔供養

即平王三十年庚子歲也

己未王四十九年乃魯隱公元年孔子春秋編年始於

此

壬戌桓王林

平王孫太子洩早卒立王

在位二十三年

甲子莊王佗

桓王子

在位十五年

乙酉

己丑第五祖提多迦者摩伽陀國人初生之時父夢金日自屋而出照耀天地前有大山諸寶嚴飾山頂泉湧

滂沱四流後遇邇多尊者為解之曰寶山者吾身也泉湧者法無盡也日從屋出者汝今入道之相也照耀天地者汝智慧超越也尊者本名香衆師因易今名焉梵語提多迦此云通真量也多迦聞師說已歡喜踊躍而唱偈言巍巍七寶山常出智慧泉迴為真法味能度諸有緣邇多尊者亦說偈曰我法傳於汝當現大智慧金日從屋出照耀於天地提多迦聞師妙偈設禮奉持後至中印度彼國有八千大仙彌遮迦為首聞尊者至率衆

瞻禮謂尊者曰昔與師同生梵天我遇阿私陀仙人授我仙法師逢十力弟子修習禪那自此報分殊塗已經六劫尊者曰支離累劫誠哉不虛今可捨邪歸正以入佛乘彌遮迦曰昔阿私陀仙人授我記云汝却後六劫當遇同學獲無漏果今也相遇非宿緣邪願師慈悲令我解脫尊者即度出家命聖授戒餘仙衆始生我慢尊者示大神通於是俱發菩提心一時出家乃告彌遮迦曰昔如來以大法眼藏密付迦葉展轉相授而至於我

我今付汝當護念之乃說偈曰通達本法心無法無非  
法悟了同未悟無心亦無法說偈踊身虛空作十八變  
火光三昧自焚其軀彌遮迦與八千比丘同收舍利於  
班荼山中起塔供養即莊王五年己丑歲也

庚子僖王胡齊

莊王子  
一名釐

治五年

五霸次興

中庸子曰  
霸者假也

用威刑而防政使仁義而不湮秦漢皆霸道也春秋  
稱五霸者左傳曰齊桓公九合諸侯一匡天下孔子  
稱為五霸之首 晉文公召天子於河陽而朝諸侯  
矣 秦繆公因伐鄭而敗諸侯悔過修德 宋襄公  
為鹿上之盟求諸侯於楚楚人許之 楚莊  
王率諸侯伐陳而立陳靈公諸侯皆伏矣

乙巳惠王閔

僖王子初莊王嬖姬姚生子頹頹有寵而後作亂王奔鄭鄭伯伐頹殺之立王時齊

桓伐楚子賁包茅不貢入周矣

治二十五年

甲子庚午襄王鄭

惠王子子帶作亂王奔鄭晉大公殺子帶立王

治三十三年

辛未世尊入滅三百年矣

此後龍猛菩薩造中論等破除有見後提婆等諸大論師

造百論等弘闡大義了義燈明

甲申第六祖彌遮迦者中印度人也既傳法已遊化至北天竺國見雉堞之上有金色祥雲歎曰斯道人氣也必有大士為吾法嗣乃入城於闐闐間有一人手持酒

器逆而問曰師何方而來欲往何所師曰從自心來欲往無處曰識我手中物否師曰此是觸器而負淨者曰師還識我否師曰我即不識識即非我又謂曰汝試自稱名氏吾當後示本因彼因說偈而答我從無量劫至于生此國本姓頗羅墮名字婆須密師曰我師提多迦說世尊昔遊北印度語阿難言此國中吾滅後三百年有一聖人姓頗羅墮名婆須密而於禪祖當獲第七世尊記汝汝應出家彼乃置器禮師側立而言曰我思往

刳嘗作檀那獻一如來寶座彼佛記我云汝於賢刳釋迦法中宣傳至教今符師說願加度脫師即與披剃復圓戒相乃告之曰正法眼藏今付於汝勿令斷絕乃說偈曰無心無可得說得不名法若了心非心始解心心法說偈已入師子奮迅三昧踊身虛空高七多羅樹却復本坐化火自焚婆須密收靈骨貯七寶函建浮圖寘於上級即襄王十五年甲申歲也

癸卯頃王壬臣

襄王子

治六年

楚莊王始霸

已酉匡王班

頃王子

在位六年

壬子

有云此年世尊入滅者破邪論引悞

乙卯定王瑜

匡王子

治二十一年

楚子問鼎之大小輕重

丁巳老聃氏於是年九月十四日生於楚國陳郡苦縣

賴鄉曲仁里魏書云老聃父姓韓名乾字元畢母曰精

敷二合而娠孕八十年而生於李樹下因以為姓名耳

字伯陽身長四尺六寸額凸眉麓反唇騫鼻髀尖胯闊

聃耳鬚頭故謚曰聃以疑獨之道秘于心三寶之德資

于用一曰慈二曰儉三曰不敢為天下先景王已郊紫  
氣浮闕欲往流沙時有函闕令尹喜知道之人也乃請  
言教老氏遂著道德二篇合五千言皆評大道也既而  
弗克至于流沙薨于槐里年八十四歲時有秦佚之弔  
三號而出是知天命殞于周也墓在槐里西南三十里  
渭水之陽今興平縣也佛先三百四十五年

甲子辛未第七祖婆須密者北天竺國人也姓頗羅墮常  
服淨衣執酒器游行里閤或吟或嘯人謂之狂及遇彌遮

迦尊者宣如來往誌自慳前緣投器出家授法行化至  
迦摩羅國廣興佛事於法座前忽有一智者自稱我名  
佛陀難提今與師論義師曰仁者論即不義義即不論  
若擬論義終非義論難提知師義勝心即欽伏曰我願  
求道霑甘露味尊者遂與剃度而授具戒復告之曰如  
來正法眼藏我今付汝汝當護持乃說偈曰心同虛空  
界示等虛空法證得虛空時無是無非法尊者即入慈  
心三昧時梵王帝釋及諸天衆俱來作禮而說偈言賢

劫衆聖祖而當第七位尊者哀念我請為宣佛地尊者  
從三昧起示衆云我所得法而非有故若識佛地離有  
無故說此語已還入三昧示涅槃相難提即於本座起  
七寶塔以葬全身即定王十七年辛未歲也

丙子簡王夷

定王  
子

治十四年

丁丑 老氏仕周為守藏吏時年二十二矣

己丑 老氏遷太史令時年三十四矣一云柱下史自

是五十四年不調時人目為吏隱也王十四年魯襄

元也

庚寅靈王泄心

簡王子

生而有髭治二十七年

庚戌二十一年十一月初四日老氏五十五歲矣

孔子生于魯國兗州鄒邑縣平鄉晉昌里實隱公後第

九代襄公二十一年冬十一月初四日按殷本紀孔子

父姓叔梁名紇為鄒邑縣宰先娶鄒氏女生子孟皮不

才後娶顏氏女名徵在夫婦禱尼丘山神而生孔子生而

有髮身長九尺六寸腰帶十圍垂手過膝河眸海口龍

顏方穎鳳顯燕頤虬髯虎視有中和之德衣莊而嚴色  
溫而厲有四十二表如世家自易姓孔氏名丘字仲尼  
至唐玄宗謚曰文宣王丘先殷之後裔穎考叔弗何祖  
焉至紂移居魯易姓叔梁後孔子追昔先王姓字以子  
配乙更姓孔氏是不忘本仁也學無常師自然英才誕  
秀聖德不羣世號素王大宣文教矣魯哀公十一年自  
衛反魯修文教於洙泗之濱祖述堯舜憲章文武之風  
約魯史而修春秋周平魯隱始之自己未終敬王魯哀

壬戌記二百四十二年之事明王室衰諸侯霸褒貶得失絕筆于獲麟之句也而傳有五左丘明公羊高穀梁赤鄒氏邾氏刪詩三百而詠國風雅頌正變之道也而傳者分為四詩毛韓魯齊詩以關雎首之明有夫婦次有父子君臣之道三綱逆順辨其國政定尚書凡百篇始于二典次及三王典謨誓誥之文備悉明也秦火之後漢儒伏生口授裁二十餘篇正禮樂有二禮記四十九篇而以曲禮首之終于喪服之制俾夫孝弟施行安

上治民廣大悉備而傳者徐生首焉周禮者六官之屬  
三百七十五明宗廟社稷王侯等差朝格典儀大金其  
式矣贊易道始于太極是生兩儀四象八卦萬物生焉  
作十翼書以明之謂上繫下繫上彖下彖上象下象文  
言說卦叙卦雜卦而傳者古今衆矣資學三千達者七  
十有二四科十哲德行顏回閔損冉耕仲弓言語宰予  
端木賜政事冉求仲由文學言偃卜商子鯉伯魚孫伋  
子思皆預其數壽七十三歲薨佛先二百九十九年

辛亥世尊示滅四百年矣

時迦濕彌羅國五百六通  
依法智論造毘婆沙論

丁巳景王貴

靈王  
次子

治二十五年

甲子第八祖佛陀難提者迦摩羅人也姓瞿曇氏頂有肉髻辨捷無礙初遇婆須密尊者出家受教既而領徒行化至提伽國城毘舍羅家見其舍有白光上騰謂徒衆曰此家聖人口無言說真大乘器不行四衢知觸穢耳言訖長者出致禮問何所須祖曰我求侍者曰我有一子名伏馱密多年已五十口未曾言足未曾

履祖曰如汝所說真吾弟子祖既見之遽起禮拜而說  
偈曰父母非我親誰是最親者諸佛非我道誰是最道  
者祖以偈答曰汝言與心親父母非可比汝行與道合  
諸佛心即是外求有相佛與汝不相似次識汝本心非  
合亦非離伏馱密多聞祖妙偈便行七步祖曰此子昔  
曾值佛悲願廣大慮父母愛情難捨故不言不履耳時長  
者遂捨令出家祖尋授具戒復告之曰我今以如來正法  
眼藏付囑於汝勿令斷絕乃說偈曰虛空無內外心法

亦如此若了虛空故是達真如理密多承師付囑以偈讚曰我師禪祖中當得為第八法化衆無量悉獲阿羅漢爾時尊者佛陀難提即現神變却復本坐儼然寂滅衆興寶塔葬其全身即景王十年丙寅歲也

乙亥孔子時年二十六適周問禮於老聃年已七十  
九

己卯老聃是年薨壽八十四歲

辛巳四月王崩劉子單子立王子猛六月子朝作亂十

月晉納王于王城十一月猛卒

是為悼王

壬午敬王丐

悼王弟

劉獻公單穆公韓宣等伐子朝立王

治四十三年

乙酉

冬克鞏逐王子朝入成周自是謂王城為西周成周為東周

壬辰十一年乃魯定元

辛丑孔子為魯司寇年已五十二矣

癸卯孔子去魯適衛

乙巳孔子之宋如陳

戊申孔子微服過宋

己酉孔子厄於陳

庚戌二十八年魯哀十一年孔子自衛返魯作春秋定

六經時年六十一歲矣

甲寅第九祖伏馱密多者提伽國人姓毗舍羅既受佛陀難提付囑後至中印度行化時有長者香蓋攜一子而來瞻禮尊者曰此子處胎六十年因號難生復嘗會一仙者謂此兒非凡當為法器今遇尊者可令出家祖

即與落髮授戒羯磨之際祥光燭座仍感舍利三十粒  
現前自此精進忘疲既而師告之曰如來大法眼藏今  
付於汝汝護念之乃說偈曰真理本無名因名顯真理  
受得真實法非真亦非偽尊者付法已即入滅盡三昧  
而般涅槃衆以香油旃檀闍維真體收舍利建塔于那  
爛陀寺即敬王三十三年甲寅歲

庚申孔子絕筆于獲麟

壬戌王四十年魯哀十六年夏四月八日孔子薨於

曲阜

甲子四十三年吳滅矣

戊寅元王仁

敬王子

治八年

越王勾踐始霸矣

癸酉貞定王介

元王子

在位二十八年

辛卯世尊示滅五百年矣

己亥第十祖脇尊者中印度人也本名難生初將誕父夢一白象背有寶座座上安一明珠從門而入光照四衆既覺遂生後值伏馱尊者執侍左右未嘗睡眠謂其

脇不至席遂號脇尊者焉初至華氏國憇一樹下右手  
指地而告衆曰此地變金色當有聖人入會言訖即變  
金色時有長者子富那夜奢合掌前立尊者問曰汝從  
何來夜奢曰我心非往尊者曰汝何處住曰我心非止  
祖曰汝不定耶曰諸佛亦然祖曰汝非諸佛曰諸佛亦  
非祖因說偈曰此地變金色預知於聖至當坐菩提樹  
覺華而成已夜奢復說偈曰師坐金色地常說真實義  
回光而照我今入三摩諦祖知其意即度出家復具戒

品乃告之曰如來大法眼藏今付於汝汝護念之乃  
說偈曰真體自然真因真說有理領得真真法無行亦  
無止付法已即現神變入于涅槃化火自焚四衆以衣  
祴盛舍利隨處興塔焉即貞王二十七年己亥歲也

辛丑考王嵬

一名隗  
貞王子

治十五年

丙辰威烈王午

考王  
子

在位二十四年

甲子王十九年魏斯好賢即文侯之德

丁丑 通鑑始于此宋司馬光集

戊寅王命趙魏韓為諸侯自此號為七雄

佛祖歷代通載卷三

欽定四庫全書

佛祖歷代通載卷四

元 釋念常 撰

戊寅韓魏趙

雷氏曰魏趙韓齊燕楚及秦是為七雄

韓武子

其先與周同姓後事晉封於韓自武子至王安十二君一百九十六年

魏武子

卑公萬之後與周同姓武王克殷封於畢時秦王嘗欲伐魏或曰文侯師田子方

受子夏經義客段干木過其間君禮賢人國民稱仁上下和合未可圖也有賢人孟軻衍淳

于髡之徒矣 惠王時有女子化為丈夫其先卑萬事於晉晉獻公封於魏在河東郡至悼

公在絳陽文武復魏自卑萬至王假凡九世通計一百年至秦始皇滅之

趙武子

其先與秦同祖殷飛廉二子惡來季勝李勝趙之先後造父為穆王御封於趙城因

姓趙氏至敬侯都邯鄲自後至大王嘉為秦將王賁虜之凡十一世計一百八十七年齊燕楚

秦見上注

庚辰安王驕

一名龍威烈王之子

治二十六年

辛巳二年晉分為三晉趙魏及韓同謀滅晉三分其地

也

丙申

齊滅矣

戊戌第十一祖富那夜奢華氏國人也姓瞿曇氏父寶

身既得法於脇尊者尋詣波羅奈國有馬鳴大士迎而  
作禮因問曰我欲識佛何者即是祖曰汝欲識佛不識  
者是曰佛既不識焉知是乎祖曰既不識佛焉知不是  
曰此是鋸義祖曰彼是木義復問鋸義者何曰與師平  
出又問木義者何祖曰汝被我解馬鳴豁然惺悟稽首  
歸依遂求剃度祖謂衆曰此大士者昔為毘舍離國王  
其國有一類人如馬被露王運神力分身為蠶彼乃得  
衣王後復生中印度馬人感戀悲鳴因號馬鳴焉如來

記云吾滅度後六百年當有賢者馬鳴於波羅奈國  
推伏異道度人無量繼吾傳化今正是時即告之曰  
如來大法眼藏今付於汝即說偈曰迷悟如隱顯明  
暗不相離今付隱顯法非一亦非二付法已即現神  
變湛然圓寂衆興寶塔以闕全身即安王十九年戊  
戌歲也

丙午烈王喜

安王子王時天  
雨金於櫟陽

治七年是歲日食

癸丑顯王扁

烈王子

在位四十八年

時蘇秦遊  
說六國

甲寅二年秦惠始稱王矣

甲子王十二年

辛未世尊示滅六百年矣

甲午第十二祖馬鳴大士者波羅奈國人也亦名功勝  
以有作無作諸功德最為殊勝故名焉既受法於夜奢  
尊者後於華氏國轉妙法輪忽有老人坐前仆地師謂  
衆曰此非庸流當有異相言訖不見俄從地踊出一金  
色人復化為女子右手指師而說偈曰稽首長老尊當

受如來記今於此地上宣通第一義說偈已瞥然不見  
師曰將有魔來與吾校力有頃風雨暴至天地晦冥師  
曰魔之來信矣吾當除之即指空中現一大金龍奮發  
威神震動山嶽師儼然於坐魔事隨滅經七日有一小  
蟲大若螞蟥潛形坐下師以手取之示眾曰斯乃魔之  
所變盜聽吾法耳乃放之令去魔不能動師告之曰汝  
但依三寶即得神通遂復本形作禮懺悔師問曰汝名  
誰邪眷屬多少曰我名迦毘摩羅有三十眷屬師曰汝

盡神力變化若何曰我化巨海極為小事師曰汝化性海  
得否曰何謂性海我未嘗知師即為說性海云山  
河大地皆依建立三昧六通由茲發現毘摩羅聞言  
遂發信心與徒衆三千俱求剃度師乃召五百羅漢  
與授具戒復告之曰如來大法眼藏今當付汝汝聽  
偈言隱顯即本法明暗元不二今付悟了法非取亦  
非離付法已即入龍奮迅三昧挺身空中如日輪相  
然後示滅四衆以真體藏之龍龕即顯王四十二年

甲午歲也

辛丑慎觀王定

子顯王

治六年

王時六國皆自稱王

丁未赧王延

慎觀王子

治五十九年

東西周分治為諸侯所侵王與居人無異王徙

都太子  
治東

甲子十八年

丙子三十年宋滅矣

壬辰第十三祖迦毘摩羅華氏國人也初為外道有徒三千通諸異論後於馬鳴尊者得法領徒至西印度彼

有太子名雲自在仰尊者名請於宮中供養祖曰如來  
有教沙門不得親近國王大臣權勢之家太子曰今我  
國城之北有大山焉山中有一石窟師可禪寂於此否  
師曰諾即入彼山行數里逢一大蟒祖直進不顧遂盤  
繞祖身祖因與受三歸依蟒聽訖而去祖將至石窟復  
有一老人素服而出合掌問訊祖曰汝何所止荅曰我  
昔嘗為比丘多樂寂靜有初學比丘數來請益而我煩  
於忘荅起嗔恨想命終墮為蟒身住是窟中今已千載

適遇尊者獲聞戒法故來謝耳祖問曰此山更有何人  
居止曰北去十里有大樹蔭覆五百大龍其樹王名龍  
樹常為龍衆說法我亦聽受耳尊者遂與徒衆詣彼龍  
樹出迎尊者深深山孤寂龍蟒所居大德至尊何枉神  
足祖曰吾非至尊來訪賢者龍樹默念曰此師得決定  
性明道眼否是大聖繼真乘否祖曰汝雖心語吾以意  
知但辨出家何慮吾之不聖龍樹聞已悔謝尊者即與  
度脫及五百龍衆俱受具戒復告龍樹曰今以如來大

法眼藏付囑於汝諦聽偈言非隱非顯法說是真實際  
悟此隱顯法非愚亦非知付法已即現神變化火焚身  
龍樹收五色舍利建塔瘞之即赧王四十六年壬辰歲  
也

乙巳

王與六國攻秦昭王怒攻西周王懼伏於秦盡  
獻其邑是年秦使將軍嫪毐攻之取九鼎寶器王  
慚而卒巳上八國六十七年內  
三百二十五年載春秋周滅

右周合三十七君八百六十七年

秦

雷氏曰昭襄孝文莊襄始皇胡  
亥子嬰秦朝六君四十九年

丙午昭襄王稷

惠文王子

姓嬴氏王水德都咸陽

今北京也

治五

年至始皇時建亥正通霸五十一年

辛亥世尊示滅七百年矣

孝文王柱

昭王子

元年修先王功臣褒厚親戚弛苑囿除

喪在位三月運數一年

壬子莊襄王楚

孝文王子以呂不韋為相

治三年

次年癸丑日

食

十四國諸侯

戰國七雄

鄭桓叔後

魏都大梁後

前後

宋殷叔後

趙都邯鄲後

諸侯

晉唐叔後

韓宣子之後

吳太伯後

秦始皇

衛康叔後

齊陳敬仲後

秦顛頊後

楚都襄郢歸統

魯公望後

燕都莫北之圖

陳舜之後

乙卯始皇政

莊襄子昭四十八年正月旦日生于邯鄲其年十三莊襄崩代立為秦王自號

始皇欲至萬世獨稱曰朕改年朝賀皆自二月朔衣  
服旌旗皆尚黑置守尉監築長城名民曰黔首用呂  
不韋趙高李斯為相蒙恬白起王翦為將併吞六國  
平一天下分三十六郡自後驕縱周遊天下因之會  
稽瑯琊遷至沙丘忽患病治三十七年壽五  
七月丙申崩于平臺矣

甲子下令逐諸侯客李斯諫而止

辛未滅韓

癸酉滅趙

丙子滅魏

戊寅滅楚

已卯虜燕王喜

庚辰滅齊

壬午二十八年東巡郡縣上鄒嶧山及登瑯琊刻石頌  
德又上泰山立石封祠祀值風雨於松下因封五大夫  
又遣徐福求仙

癸未沙門室利防等一十八人來自西域帝惡其異俗  
以付獄俄有金剛神碎獄門而出之帝懼即厚禮遣之  
時國事區區弗克敬奉

丁亥築長城

戊子焚書

己丑坑儒作阿房宮

第十四祖龍樹尊者西天竺國人也亦名龍勝始於摩羅尊者得法後至南印度彼國之人多信福業聞尊者為說妙法遞相謂曰人有福業世間第一徒言佛性誰能覩之尊者曰汝欲見佛性先須除我慢彼人曰佛性大小尊者曰非大非小非廣非狹無福無報不死不生

彼聞理勝悉回初心尊者復於座上現自在身如滿月輪一切衆唯聞法音不覩師相彼衆中有長者子名迦那提婆謂衆曰識此相否衆曰目所未覩安能辯識提婆曰此是尊者現佛性體相以示我等何以知之蓋以無相三昧形如滿月佛性之義廓然虛明言訖輪相即隱復居本座而說偈言身現圓月相以表諸佛體說法無其形用辨非聲色彼衆聞偈咸願出家以求解脫尊者即為剃髮命諸聖授具其國先有外道五千餘人作

大幻術衆皆宗仰尊者悉為化之令歸三寶復造大智度  
論中論十二門論垂之於世後告上首弟子迦那提婆曰  
如來大法眼藏今當付汝聽吾偈言為明隱顯法方說  
解脫理於法心不證無瞋亦無喜付法託入月輪三昧  
廣現神變復就本座凝然禪寂迦那提婆與諸四衆共  
建寶塔以葬焉即秦始皇三十五年己丑歲也

壬辰二世胡亥

缺

一即位  
治三年

癸巳

劉季起沛項羽起江東率諸侯  
伐秦陳勝吳廣起天下大亂矣

甲午

為趙高殺  
於望夷宮

三世子嬰

扶蘇子 初趙高使塔闔樂殺二世乃引璽  
佩之百官莫從將上殿殿欲壞者三高知天

命不與乃立子嬰即位三世殺趙高於齋宮夷其三  
族後沛公入關子嬰即係頸以組白馬素車奉璽  
降於軹道為秦王四十六日沛公既入咸陽封宮  
室府庫還軍灞上 項羽後入關遂殺子嬰秦遂滅  
矣

右秦

自始皇二十六年初并天下  
居帝位凡十五年而漢滅之

西漢

雷氏曰漢高惠呂文景武昭昌邑宣  
元成哀平孺十有四君二百十四

欽定四庫全書

乙未高祖邦

原闕

佛祖歷代通載  
卷四

丙申二年冬十月五星聚東井十一月名諸縣父老約  
法三章殺人者死傷人及盜抵罪餘去秦法

丁酉項羽使英布殺義帝於郴是年滅韓趙魏三國

戊戌滅齊

己亥滅燕與項羽約洪溝為界以分天下

庚子會諸將圍羽於垓下虞姬自刎

辛丑改咸陽為長安

丁未孝惠盈

字日滿高祖子母呂氏十七即位見母殘酷使人請太后曰吾終不能治天下遂縱

酒色媼樂甲寅八月崩於未央宮葬安陵壽二十四歲

治七年始有笛

帝時立仲作之

笛者滌也滌蕩邪穢納於雅正龍笛有七孔竹笛五孔羌笛三孔也

癸丑起長安西市脩教倉

甲寅高后薨

姓呂氏單父呂公女少帝幼太后臨朝稱制立諸呂為王欲謀天下幾危劉氏劉章

周勃誅諸呂矣

治八年

壽七十一

乙卯地震六月晦日食行八銖錢

丙辰秋星晝見

戊午五年南越王自稱武帝

己未 春星晝見 行五分錢

庚申正月日食

壬戌文帝恒

高祖次子母薄姬初呂后封諸呂為王陳平周勃劉章共誅諸呂三千人以立文帝

性資寬惠溫純謹潔衣不華飾百姓富樂自即位後凡下二十七詔利民太半甲申崩未央宮葬灞陵壽

四十 治二十三年

甲子文帝三年也

庚辰第十五祖迦那提婆南天竺國人也姓毘舍羅初

求福業兼樂辯論後謁龍樹大士將及門樹知是智人  
先遣侍者以滿鉢水置於座前提婆見之即以一針投  
之而進忻然契會樹即為說法不起於坐現月輪相唯  
聞其聲不見其形師語衆曰今此瑞者師現佛性表說  
法非聲色也師得法後至毘羅國彼有長者曰梵摩淨  
德一日園樹生大耳如菌味甚美惟長者與第二子羅  
睺羅多取而食之取已隨長盡而復生自餘親屬皆不  
能見時尊者知其宿因遂至其家長者問其故尊者曰

汝家昔曾供養一比丘然此比丘道眼未明以虛露信  
施故報為木菌唯汝與子精誠供養得以享之餘即否  
矣又問長者年多少曰七十有九尊者乃說偈曰入道  
不通理覆身還信施汝年八十一此樹不生耳長者聞  
偈彌加歎伏且曰弟子衰老不能事師願舍次子隨師  
出家尊者曰昔如來記此子當第二五百年為大教主  
今之相遇蓋符宿因即與剃髮執侍至巴連弗城聞諸  
外道欲障佛法計之既久尊者乃執長幡入彼衆中彼

問祖曰汝何不前祖曰汝何不後又曰汝似賤人祖曰汝是良人又曰汝解何法祖曰汝百不解又曰我欲得佛祖曰我灼然得佛又曰汝不合得祖曰元道我得汝實不得又曰汝既不得云何言得祖曰汝有我故所以不得我無我我故自當得彼辭既屈乃問祖曰汝名何等祖曰我名迦那提婆彼既夙聞祖名乃悔過致謝時衆中猶互興問難尊者折以無礙之辯由是歸伏乃告上足羅睺羅多而付法眼偈曰本對傳法人為說解

脫理於法實無證無終亦無始說偈已入奮迅定身放八

光而歸寂滅學衆興塔而供養之即前漢文帝十九年

庚辰歲也

乙酉景帝啟

文帝子母竇氏三十二歲即位好黃老二子令宮人皆誦之因改子書為經庚子崩

未央宮葬陽陵壽四十八

治十六年

丁亥

三年用晁錯策七國皆反遣周亞夫將三十六將攻之復用袁盎之謀斬錯以謝七國天下大

定矣

辛亥世尊示滅八百年矣

戊戌

帝減笞法定筭令疑周亞夫功大欲獄之遂嘔血而死

辛丑武帝徹改建元

景之中子母王夫人嘗得策文曰二十七倒策果七十二歲崩於五

祚殿葬於茂陵十七即位

治五十四年

元依運歷圖辛丑建元東方朔為太史

乙巳

帝好仙術敬方士文成五利等鑄半兩錢貪地好殺命司馬遷等造漢太初歷以正月為

歲首色尚黃數用五興太學修郊祀定音律作詩樂建封禪禮百神紹周後號令文章煥然可述矣

丁未改元光

癸丑改元朔

己未改元狩

淮南王安衡山王賜以謀反誅戮其黨累數萬人

庚申

用孫寬為相衛青霍去病為將北伐匈奴開河  
朔之地又平南越王東滅朝鮮為郡縣西

歷五國執昆耶王收休屠王後遣  
張騫西往身毒國尋浮圖教果獲之

甲子四月初作誥官之有誥始此

乙丑改元鼎

戊辰第十六祖羅睺羅多者迦毘羅國人也行化至室  
羅筏城有河名曰金水其味殊美中流復現五佛影祖  
告衆曰此河之源凡五百里有聖者僧迦難提居於彼  
處佛誌一千年後當紹聖位語已領諸學衆沂流而上

至彼見僧伽難提安坐入定祖與衆伺之經三七日方  
從定起祖問曰汝身定邪心定邪曰身心俱定祖曰身  
心俱定何有出入曰雖有出入不失定相如金在井金  
體常寂祖曰若金在井若金出井金無動靜何物出入  
曰言金動靜何物出入許金出入金非動靜祖曰若金  
在井出者何金若金出井在者何物曰金若出井在者  
非金金若在井出者非物祖曰此義不然曰彼理非著  
祖曰此義當墮曰彼義不成祖曰彼義不成我義成矣

曰我義雖成法非我故祖曰我義已成我無我故曰我  
無我故復成何義祖曰我無我故成汝義曰仁者師  
於何聖得是無我祖曰我師迦那提婆證是無我曰稽  
首提婆師而出於仁者仁者無我故我欲師仁者祖曰  
我已無我故汝須見我我汝若師我故知我非我我難  
提心意豁然即求度脫尊者曰汝心自在非我所繫語  
已即以右手擎金鉢舉至梵宮取彼香飯將齋大衆而  
大衆忽生厭惡之心尊者曰非我之咎汝等自業即命

伽難提分坐同食衆復訝之祖曰汝不得食皆由此故  
當知與吾分坐者即過去娑羅樹王如來也愍物降迹  
汝輩亦莊嚴劫中已至三果而未證無漏者也衆曰我師  
神力斯可信矣彼云過去佛者即竊疑焉羅睺羅多知  
衆生慢乃曰世尊在日世界平正無有丘陵江河溝洫  
水悉甘美草木滋茂國土豐盈無八苦行十善自雙樹  
示滅八百餘年世界丘墟草木枯悴人無至信正念輕  
微不信真如唯愛神力言託以右手漸展入地至金剛

輪際取甘露水以琉璃器持至會所大衆見之即時欽慕悔過作禮於是尊者命僧伽難提而付法眼偈曰於法實無證不取亦不離法非有無相內外云何起付法已安坐歸寂四衆建塔當前漢武帝二十八年戊辰歲也

辛未改元封

丁丑改太初

辛巳改天漢

乙酉改太始

己丑改征和

庚寅

巫蠱起江充等掘蠱於太子宮太子與皇后謀斬充與丞相劉屈釐大戰長安死者不啻數萬

乙未昭帝弗

武之子母趙婕妤好九歲即位霍光受遺詔以周公輔政至戊申四月崩未央宮

葬於平陵壽二十二歲

治十三年改始元

辛丑改元鳳

上官桀子安與霍光爭權帝終知霍光之忠烈矣

丁未改元平

第十七祖僧伽難提者室羅筏城寶莊嚴王之子也生

而能言常讚佛事七歲即厭世樂以偈告其父母曰稽  
首大慈父和南骨血母我今欲出家幸願哀愍故父母  
固止之遂終日不食乃許其在家出家號僧伽難提復  
命沙門禪利多為之師積十九載未嘗退倦尊者每自  
念言身居王宮胡為出家一夕天光下屬見一路坦平  
不覺徐行約十里許至大岩前有石窟焉乃燕寂於中  
父既失子即擯禪利多出國訪尋其子不知所在經十  
年尊者得法受記已行化至摩提國忽有涼風襲衆身

心悅適非常而不知其然祖曰此道德之風也當有聖者出世嗣續祖燈乎言訖以神力攝諸大衆遊歷山谷食頃至一峰下謂衆曰此峰頂有紫雲如蓋聖人居此矣即於大衆徘徊久之見山舍一童子持圓鑑直造尊者前祖問汝幾歲邪曰百歲祖曰汝年尚幼何言百歲曰我不會理正百歲耳祖曰汝善機邪曰佛言若人生百歲不會諸佛機未若生一日而得決了之祖曰汝手中當何所表曰諸佛大圓鑑內外無瑕翳兩人同得見

心眼皆相似彼父母聞子語即舍令出家祖携至本處  
受具戒訖名伽邪舍多他時聞風吹殿銅鈴聲祖問鈴  
鳴邪風鳴邪舍多曰非風非鈴我心鳴耳祖曰心復誰  
乎曰俱寂靜故尊者曰善哉善哉繼吾道者非予而誰  
即付法偈曰心地本無生因地從緣起緣種不相妨華  
果亦復尔付法已右手攀樹而化大衆議曰尊者樹下  
歸寂其垂蔭後裔乎將奉全身於高原建塔衆力不能  
舉即就樹下起塔當前漢昭帝十三年丁未歲也

戊申昌邑王

名賀哀王髡之子武之孫在位二十七日

狂縱淫戲無度罪犯一千一百二十七事  
霍光與旧延年白太后解璽送之昌邑廢為海昏侯  
誅昌邑羣臣不能輔道者二百餘人唯王吉龔遂以

數諫  
得免

宣帝詢改本始

武帝曾孫戾太子孫生而足下有毛初  
名病已戾太子被巫蠱事已在襁褓賴

丙吉救養在於掖庭外家霍光廢昌邑奏太后就  
間迎之即位遠方來朝號中興主壬申十二月崩未  
央宮壽四十  
三葬杜陵

治二十四年

時殺一  
石五錢

壬子改地節

丙辰改元康

庚申改神爵

甲子五鳳

戊辰改甘露

辛未

帝興自民間知民疾苦魏相丙吉為相黃霸  
龔遂為太守從耿壽昌奏置常平倉以利民

世尊示滅九百年矣

時北天竺富婁叉國有大論師名憍尸迦三子同號婆

蘇盤豆此曰天親長曰阿僧佉此云無著首暢大乘阿

瑜闍國大講堂中請聖慈尊說瑜伽論廣明五分十七

地義次曰伐蘇畔徒此云世親首學小乘造具舍論後  
從兄化演暢真宗造唯識等窮探大義幼曰比隣持弗  
婆提此云獅子覺造集論釋大有研尋異矣哉三弘中  
道並譽五天妙旃檀林寧容荆棘俱求知足歸真應期  
御世談玄難可詳矣

壬申改黃龍

癸酉元帝奘改初元

宣之子二十七歲即位戊子五月  
崩於未央宮葬渭陵壽四十三用

儒  
治十六年

戊寅改永光

癸未改建昭

戊子改竟寧

己丑成帝驚改建始

字太孫元帝子二十即位以諸舅王鳳等為列侯更遞為相五侯專

政賢臣屏退甲寅三月崩未央宮

在位二十六年

壽四十五 葬延陵

癸巳改河平

丁酉改陽朔

辛丑改鴻嘉

光祿大夫劉向傳比觀典籍往見有佛經

乙巳改永始

戊申第十八祖伽邪舍多摩提國人也姓鬱頭藍父天蓋母方聖嘗夢大神持鑑因時有娠凡七日而誕肌體瑩如琉璃未嘗洗沐自然香潔幼好閒靜語非常童持鑑出遊遇難提尊者得度領徒至大月氏國見一婆羅門舍有異氣祖將入彼舍舍主鳩摩羅多問曰是何徒衆曰是佛弟子彼聞佛號心神竦然即時閉戶祖良久自扣其門羅多曰此舍無人祖曰荅無者誰羅多聞語知是

異人遽開關延接尊者曰昔世尊記曰吾滅後一千年  
有大士出現於月氏國紹隆玄化今汝值吾應斯嘉運  
於是鳩摩羅多發宿命智投誠出家受具訖付法偈曰  
有種有心地因緣能發萌於緣不相礙當生生不生付  
法已踊身虛空現十八變化火光三昧自焚其身衆以  
舍利起塔當前漢成帝二十年戊申歲也

巳酉改元延

癸丑改綏和

都水使者劉向集列仙傳檢藏得梵本  
佛經六十餘卷編入仙傳則知自周以

來有之人  
未識爾

乙卯哀帝欣改建平

元帝庶孫定陶恭王子十九即位  
六年庚申六月崩未央宮葬義陵

壽二  
十五 在位六年

己未改元壽

景憲使西域大月氏王  
令木子口投獻浮圖經

辛酉平帝衍改元始

元帝庶孫中山孝王興之子三歲  
封為王元壽二年九月即位時方

九歲王莽秉政乙丑崩  
未央宮葬康陵壽十四

治五年

加王莽為大司馬又  
升為太傅號安漢公

甲子立莽女為后 莽加宰衡

丙寅孺子嬰

宣帝玄孫廣戚侯顯之子莽既鸞平帝嬰  
在襁褓年二歲即位莽初行周公故事一

如天子吏民稱臣  
帝至戊辰而崩矣  
治三年

戊辰改初始

王莽以偽符  
瑞遂即位矣

新室

姓王氏都長安以十二月建平  
雷氏曰莽玄益子合十八年

已巳莽字巨君

王皇后弟成帝之舅王曼之子元城人  
初封新都侯以女為平帝后後篡奪即

位國號大新至地皇四年為漢光武軍師殺之

在位十五年改元建國

甲戌改天鳳

庚寅改地皇

壬午第十九祖鳩摩羅多者大月氏國婆羅門之子也

昔為自在天人

欲界第六天

見菩薩瓔珞忽起愛心墮生忉

利

欲界第二天

聞憍尸迦說般若波羅密多以法勝故升於

梵天

色界

以根利故善說法要諸天尊為導師以繼祖時

至遂降生月氏後至中天竺國有大士闍夜多問曰我

家父母素信三寶而嘗縈疾瘵凡所營作皆不如意而

我隣家久為旃陀羅行而身常勇健所作和合彼何幸而

我何辜尊者曰何足疑乎且善惡之報有三時焉凡人

但見仁天暴壽逆吉義凶便謂此因果虛罪福殊不知

影響相隨毫釐靡忒縱經百萬劫亦不磨滅時闇夜  
多聞是語已頓釋所疑祖曰汝雖已信三業而未明業  
從惑生惑因識有識依不覺不覺依心心本清淨無生  
滅無造作無報應無勝負寂寂然靈靈然汝若入此法  
門可與諸佛同矣一切善惡有為無為皆如夢幻闍夜  
多承言領旨即發宿慧懇求出家既受具尊者告曰吾  
今寂滅時至汝當紹行化迹乃付法眼偈曰性上本無生  
為對求人說於法既無得何懷決不決祖曰此是妙音如

來見性清淨之句汝宜傳布後學言訖即於座上以拍  
爪釐面如紅蓮開出大光明照耀四衆而入寂滅闇夜  
多起塔當新室十四年壬午歲也

癸未淮陽劉玄

字聖公景帝七代孫光武族兄景帝生長沙王發春陵侯買戴侯熊渠蒼梧太

守利子張主聖公為王素懦弱羞愧汗流舉手不能言二年因收馬於郊下因縊殺之光武使鄧禹葬於

霸陵治二年改元更始

甲申劉盆子

太山式人陽城王章之後憲武侯萌之子初與樊崇起莒皆未眉破莽建武三年降

於光武遂封趙王

治一年

東漢

都洛陽姓劉氏王火德。雷氏云先明章和  
殤安北鄉順冲質桓靈獻遭殃合十三主百

九十  
五

乙酉世祖光武帝秀

字文叔南蔡人高祖九世孫景帝  
子長沙王發生春陵侯買鬱林太

守外鉅鹿都尉回南頓令欽之子生有赤光照室既  
長用嚴子陵策復興漢室遂即位於鄗南後移都洛  
丁巳二月崩於南宮前  
殿壽六十二葬原陵

治三十三年改元建武

戊戌封孔子為褒城侯

辛亥世尊示滅一千年矣

此後護法諸大菩薩  
等相次出世造論矣

丙辰改中元 京師有醴泉出飲者疾愈矣

戊午明帝莊

光武第四子十歲通春秋三十即位大興儒學乙亥崩於東宮前殿壽四十八莫顯

節陵治十八年改元永平

辛酉帝夢金人身長丈六項佩日輪飛至殿庭旦集羣臣令占所夢通人傅毅奏曰臣按周書異記昭王二十四年甲寅四月八日平旦之時暴風忽起宮殿人舍咸悉震動夜有五色光氣入貫太微徧於四方盡作青紅色王問太史蕪由曰是何祥也對曰西方有大聖人生也王曰於天下何如對曰此時無他後一千年聲教被

及此土王使鐫石記之埋在南郊天祠前以年計之至今辛酉一千一十年也陛下所夢將必是乎帝信以為然即遣中郎將蔡愔博士王遵秦憬等十有八人西訪其道至大月氏國果遇迦葉摩騰竺法蘭二三歲持優填王第四造白氎像并四十二章經愔等奉迎而歸於洛矣

戊辰教流此土十二月三十日愔等迎二沙門至於洛陽帝令模像置清涼臺及顯節陵并洛京西門以示萬

姓梵漢二經安蘭臺石室

已巳詔以釋迦寶像奉安顯節陵及清涼臺供養帝於  
城西雍門外立寺與騰蘭居之以白馬駝經而來遂名  
白馬寺騰蘭初譯四十二章經帝幸其寺騰蘭進曰寺  
東何館帝曰昔有阜無因而起夷之復然夜有光恠民  
呼為聖冢因祀之疑洛陽神也騰曰按天竺金藏詮所  
誌阿育王歲如來舍利於天下凡八萬四千所今支那  
震旦境中十有九處此其一也帝大驚即日駕幸聖冢

而騰蘭隨往拜忽有圓光現冢上三身現光中侍衛呼  
萬歲帝喜曰不遇二大士安知上聖遺祐哉詔塔於上  
受制度於騰蘭塔成九層高二百尺明年光又現有金  
色手出塔頂尺許如琉璃中有天香郁然帝駕幸拜瞻  
光隨步武旋繞自午及申而滅矣

庚午法蘭出十地斷結經

辛未

楚王英皇弟也學黃老與佛作圖識  
以謀反廢徙丹陽自殺累及千餘人

壬申釋道比較焚經是年正月一日五嶽諸山道士褚

善信等上表欲相比較時南嶽道士褚善信等西嶽道士劉正念等北嶽道士桓文度等東嶽道士焦德心等嵩嶽道士呂惠通等諸山道士費叔才祁文信等一千三百一十人表以奏聞勅納表遣尚書令宋庠引入長樂宮以今月十五日可集白馬寺築壇火驗時道士等將真元五訣符錄等五百九卷茅成子等二十七家二百三十五卷通計七百四十八卷置之壇上褚費之徒焚香呪已遂使火之諸子道書皆滅灰燼褚費二人自

感而死次將梵本火然赫奕宛如鼎新更增光潔時摩  
騰法師神變凌空冷然偈曰狐非師子類燈非日月明  
池無巨海納丘無山嶽嶭法雲垂世界善種得開明顯  
通希有法處處化羣生乃至弘宣法戒藏等神通勝事  
驚心士庶投誠出家者衆時有司空陽城侯劉善峻等  
一千餘人出家慕道四嶽道士呂惠通等六百二十八  
人抽簪落髮夫人王媵好等與宮媛二百三十餘人厭  
俗歸真南嶽道士蔡褚善信不蒙披剃既而明帝設齋

親與下髮廣施衣鉢大啓玄宗廣度僧尼高崇十寺城外七寺安僧城內三寺安尼寺之得名自斯而始備如佛道論

石室論云昔西域聖人之教既非哀周暴秦之君能致然西漢二三英主有可致之德而聖教亦不至獨現夢於顯宗凡近古高僧皆推聖人去世登千載而後教至曾未有考著顯宗之德有必感聖人之理此子通論所以作也夫兩漢有天下傳一十四世有君

德者二祖四宗而已二祖蓋立極之主固無可議若  
三宗各有其美而不能止其弊唯顯宗為至焉有太  
宗恭儉之美而文雅威重過之有世宗經畧四夷之  
勲而無世宗淫侈之弊有中宗政治之明而崇儒尚  
德過之斯蓋兼有三宗之長而無三宗之短是以班  
固傳毅頌其勲德於漢為最盛然世之學者不以班  
傳為信徒見鍾離意傳謂帝性褊察好以耳目隱發為  
明遂以此為顯宗實錄嗚呼豈篤論哉昔仲尼平章

討論五帝三王治具以貽後世迨其歿遭暴秦燔毀之餘世宗僅能舉之而已至顯宗乃始躬行儒術尊養三老五更饗社禮畢帝正坐自講諸儒執經問難於是時冠帶搢紳之士園橋門而觀聽者億萬計濟濟乎洋洋乎由三代以來儒風之盛莫甚於永平時也及章和之後諸儒開館授道著籍者動逾千數蓋永平之化行猶周南麟趾之應也初雖獄訟繁劇帝臨政刻意裁斷精嚴蓋善善惡惡之實猶孔子為司

寇七日而誅少正卯暫臨夾谷而盡誅優倡此誠不  
不可以少假仁恕也謂之褊察則過矣予謂使孔子  
復生必曰顯宗吾無間然矣由顯宗包舉西漢三宗  
之美躬行古帝王之道此所以精爽與吾佛感通而  
聖教因之被於中夏與儒相表裏而廣天下以善也  
夫豈偶爾哉

甲戌第二十祖闍夜多者北天竺國人也智惠淵沖化  
導無量後至羅閱城敷揚頓教彼有學衆唯尚辯論為

首者名婆脩盤頭

此云徧行

常一食不卧六時禮佛清淨無

欲為衆所歸祖將欲度之先問彼衆曰此徧行頭陀能脩梵行可得佛道乎衆曰我師精進何故不可祖曰汝師於道遠矣設苦行歷於塵劫皆虛妄之本也衆曰尊者蘊何德行而譏我師祖曰我不求道亦不顛倒我不禮佛亦不輕慢我不長坐亦不懈怠我不一食亦不雜食我不知足亦不貪欲心無所希名之曰道時徧行聞已發無漏智惟喜讚歎尊者又語彼衆曰會吾語否吾

所以然者為其求道心切夫絃急即斷故吾不贊令其  
住安樂地入諸佛智復告徧行曰吾適對衆抑挫仁者  
得無惱於衷乎曰我憶念七劫前生安樂國師於智者月  
淨記我非久當證斯陀含果時有大光明菩薩出世我  
以老故策杖禮謁師叱我曰重子輕父一何鄙哉時我  
自謂無過請師示之師曰汝禮大光明菩薩以杖倚壁  
畫佛面以此過慢遂失二果我責躬悔過以來聞諸惡  
言如風如響况今獲飲無上甘露而反生熱惱耶唯願

大慈以妙道垂誨祖曰汝久植衆德當繼吾宗聽吾偈  
曰言下合無生同於法界性若能如是解通達理事竟  
付法已不起於坐奄然歸寂闍維收舍利建塔當後漢  
明帝十七年甲戌歲也



佛祖歷代通載卷四